



₹ 5/

# तुबारि

www.pangi.in

अब अंग्रेजी, हिन्दी त  
पंगवाड़ी भाषा अन्तर असी।

Issue 79; 12/10/2018

## बिषय सूची

होरी मने कोई ना समझता	1
सबरे फल	2
कुई बचाए, कुई पढ़ाए	2
नीती वचन	3
चोउर मोमबती	3
कांटी के बुच फियुड़	4

## खास दन

- 10 अक्तुबरे नाऊ रात्रे
- 14 अक्तुबरे फुल्याट
- 15 अक्तुबरे फुल्याट
- 16 हुणेमालि
- 27 अक्तुबरे करवाचौथ



धाणि त तसे जुएली  
केआं अब सते बंटी अठ फेरे  
लवाण चाहिए। सत फेरे तेन्के  
व्याहे, आठुं जे फेरा असा, से  
कुई जे लवाण  
चहिए कि से कुई  
बचांते त तेस



## होरी मने कोई ना समझता

यक काउ रंगे पेखुरु साफ  
अम्मर अन्तर उडरुण लगो थियू।  
तेस पेखुरु अगाश साफ केण लगा।  
तेस पेखुरु अपु देश केण लगु। तेस  
पेखुरु यक जोरदार विचार उडारी  
कइ होर देश घिन गई। तेस पे  
खुरु यक नोउआ देश कआ। तेस पे  
खुरु कोई चोट नेओथ लगो।  
तेस यक चेखुरु मेउ “कोकल  
कोकल”। तेस पेखुरु कुछ समझ नेओथ एण लगो।  
तेन पेखुरु बोलु मोउं कुछ समझ नेई एण लगो। में  
देशे चेखुरु त ई बोक ना कते।



तेस पेखुरु यक हुडानी मेईया। से हासण लगो  
थिया। तेन पेखुरु से कआ त तेस केँ गा। तेन पेखुरु  
बोलु ‘ची ची’ पेखुरु हुडानी जे बोलु ‘ची ची ची ची’  
रहोइ बोलु ‘ओले’। पेखुरु पुछतु ‘किस? पेखुरु ई  
किस भुतुं कि यक देशे पेखुरु के  
बोक होर देशे पेखुरु किस ना ऐंती  
समझ? सोभी के बोक यके किसमी  
किस ना भुंती? तेस देशे मेहणु  
जानवर त होरे सोभ यके किसमी  
भाषा बोते त समझते। होर जगाही  
मेहणु जी होर जगाही भाषा शचण  
टेम लगती तिहांणी होरी जीवी बी  
टेम लगता।



## लेहु दान करे

लेहु दान करण चहिए किस कि तेसे बोलि अस त  
सुसर रहेंते, पर केसे होरी बि कम ऐंतु। एसे बोलि केसे  
होरि जीवन मेता त कि तुसि माडु लगतु ना? टेम-टेम  
बठ तुस सोभ अपु लेहु होरी दे दिया करे जेसे बोलि  
तुस स्वास्थ रहेते, त होरि जीवन मेता।





तुबारि पत्रिके अन्तर छपो सोबी लेख, त कथा अन्तर  
भुओ विचार सिर्फ लेखके भो। तुबारि पत्रिके एसे कोई  
जिम्मेबारी नेई। तुबारि पत्रिका सिर्फ भाषा सुहलियत करण  
जे यक मंच देण लगो असी।



## सबरे फल

यक गरीब मेहणु, अपु गरीबी केआं परिशान भोई कइ, गड भरण जे घेई गा। तठि यक सधु थिया। तेन से मेहणु गड भरण केईआं रोक छड़ा। सधु तेस मेहणु केआं पुछु, “तू किस गड भरण लगो थिया? की परिशानी असी?” तोउं तेन मेहणु अपु आपबीती सोब शुणाई। तेस मेहणु परिशानी शुण कइ सधु बोलु, “मोउं केई यक विद्दया असी, जेसे बेलि यक जादू घेडु बणतु। त जे बि तेस घेडु केआं मगियेल, से जादू घेडु सोब किछ दी छता। पर जिएस से घेडू टूट घियेल, तसे टेम, जे किछ बि एन घेडू दुतो असु, से सोब खतम भोई घेन्तु। अगर तू दुई साल तकर में सेवा करियाल, त एस घेडु अउं तेन्धे दी छता। त अगर तू पन्ज साल तकर में सेवा करियाल त अउं एस घेडु बणाणे विद्दया तोउ शिचाली छता। बोल तू की चाहांता?” तेन मेहणु बोलु, महाराज! अउं त दुईए साल तुं सेवा करण चाहांता। मोउं त बस झठ ए घेडु लोतु। अउं एस सम्हाडी कइ रखता, कदि ना टोइता। इ कर कइ दुई साले बाद, तेस मेहणु से घेडु मेई गोउ। तोउं से मेहणु झठ अपु गी पूज गा। तेन मेहणु घेडू केआं अपु हर यक इच्छा पूरी करवाण शुरु कइ छेइ। तेन अपफ जे महल बणा,



नौखर-चाकर मगे, त सोबी अपु शानो-शौकत हरालण लगा। से सोभी भेई भेई कइ धाम खलाण लगा त तीं पैसे उडारण लगा। तेन अराख बि पीण शुरु कइ छड़ा। तोउं तेस यक रोज सुआ लाग चढी त तेन अपु घेडु मगरी पुठ किया त नचण लगा। नचते नचते तेस गोता लगा त से घेडू तसे मगरी पुठा भीं झइ कइ टूट गऊ। तेस घेडू टूटते ईं सोब किछ खतम भोई गऊ। अब से मेहणु सोचण लगा “मेई जल्दबाजी ना कियो भुन्तीथ त घेडु बणाणे विद्दया शिचो भुन्तीथ। त आज अउं दुबारी गरीब ना बणताथ।”

ईश्वर असी हमेशा दुई बथ पुठ रखता, यक सुक्ति त दौडी बाडी त दोकी औखि त लम्मी टेमी बाडी, पर इ असी चुणुण एन्तु कि असी केस बथ पुठ हंठुण। कोई बि कम उतौड़ी अन्तर करुण ठीक ना भुन्तु, बल्कि कि धीरज धर कर ज्ञान तुसी पक्का बणांता। जीं बोते कि “जे धीरा, से पूरा। जे उतौड़ा, से बौरा।”

## कुई बचाए, कुई पढ़ाए

कुई बचाए, कुई पढ़ाए। एसे शुरुआत भारते प्रधान मन्त्री श्री नरेन्द्र मोदी जीए बेलि सोभी कियां पहला हरियाणे पानीपत अन्तर 22 जनवरी 2015 लेस्पते भुई। ई योजना कुई के बारे मेहणु जागरुक करण जे असी। भूण हत्या पुरी तरीके जोई खत्म करण जे ई योजना खोलो असी, ताकी कुई के जीवन बच सकियेल त तेन्ही बी दुनीया हेरणे मोका मेई सकियेल। त से बी असी त तुसी बुच एई कइ अपु जीवन जीयेल त से पढ़ लिख कइ या अब्बल मेहणु बणियेल जेसे बेलि कि से केसेरी कुई, भेण, ई, पुफी, दादी बणी सकियेल। कुई बचाए, कुई पढ़ाए, एस योजना जे भारत सरकारे 100 करोड़ रु० के योगदान दिता। सेंसस रिपोर्ट 2011 हसाब जोई हेरियेल त अस हेरते कि 0 कियां 6 साले कुई अन्तर सुआ गिरावट आओ असी। 2001 अन्तर ए 927/1000 थी जद कि 2011 अन्तर ए हाउ बी झइ कइ 919/1000 बट पुजी। आजकले हस्पताडी अन्तर किस्मी किस्मी मेशीने नुसो असी, जेसे बेलि मेहणु के पेट अन्तर हेर कइ पता लुआई छांते कि पेट अन्तर की गेभुरु असु, कुई की कुआ? कुआ भुआ त तेस पेट अन्तर बिशण देंते। बचारी कुई भुई त तेस भीं कढ़ाई छांते जेसे बेलि कि कुई आजकल घटती गओ असी। अस सोभ जे तेन्ही कुई जोई ई किस कते? खली कियां बहेर एई कइ बी तेस जे खारु.खोटु बोते। जीं अस कोयी र खते तिहांणी अस कुई किस ना रखते, जेसे बोली कि तेसे जीण जे




## नीती वचन

- \* अक्लदार कोआ हेर कइ बोट खुश भुन्ता, पर मुख कोईए बझई जुएई ई उदास रहेती।
- \* पापी मेहणु के रखो धने बेलिए लाभ ना भुन्ता, पर धर्म बझई जुएई मरण केईया बच घेन्ते।
- \* धर्मी मेहणु परमेश्वर कदी पुके मरण ना देन्ता। पर पापी मेहणु के इच्छा बि पूरी भुण ना देन्ता।
- \* जे कम करण हेर सुस्त भोई घेन्ता, से गरीब भोई घेन्ता। पर कमेर मेहणु अपु हथेरी बेलिए अमीर बण घेन्ता।
- \* जे कुआ बरशाइ बेहइता, से अक्लदरी जुएई कम करणेवाइ भो। पर जे कुआ लुणणे टेम नस-भास उंघ बिश्ता से बेशरमी बझह बणता।
- \* धर्मी मेहणु पुठ सुआ अशुष भुन्ति। पर पापी मेहणु अपु मुँह नियोकाण एन्तु।
- \* धर्मी मेहणु याद कर कइ सोब मेहणु तेन्हि अशुष देन्ते। पर दुष्ट मेहणु के नउ खतम भोई घेन्तु।
- \* जे मेहणु अक्लदार असे से कहेणा मनते। पर जे मेहणु बक-बक करणे बाड़े मुख असे, से ़ाका खांते।
- \* जे भलाई जुएई चलता, से नडर भोई हंठता। पर जे बुरी चाल चलता, तसे चाल यक रोज समाड़ी एई घेन्ती।
- \* जे नञ मटाका कता, तसे बेलिए होरी दुख मेता। त जे बक बक करणेबाइ त मुख असा, से ़ाका खांता।

## चोउर मोमबती

राति टेम थिया। चोहरो कना अन्हारु थियु। तठि यक भखरी अन्तर चोउर मोमबती जाओ थी। अकेले बिश कई से चोहरो जेई अपफ बुच बोक करण लगो थी। पहेली मोमबती बोलु, “अउं शान्ति भो, पर मोउं लगतु कि अब इस मतोक में जरूरत नेई। हर कना ‘इ में भो, इ में भो’ त लूट मार मचो असी। अउं अब इठि हउ बिश ना सकती।” इ बोल कइ, से मोमबती हुश गई। दोकि मोमबती बोलु, “अउं विश्वास भो, पर मोउं लगतु कि झूठ त फरेब अतु बध गोओ असा कि अब में इठि कोई जरूरत नेई। अउं बि इठिया घेई घेन्ती।” इ बोल कइ दोकि मोमबती बि हुश गई। टेकी मोमबती बि दुखी भोई कइ बोलु, “अउं परेम भो। मोउं केई जाई बिशणे तागत असी। पर आजकण जवाने अन्तर हर यक जेई अपु-अपु कम अन्तर अत मस्त भोई गोओ असा, कि में लिए केसे केई टेम नेई। होरि जुओइ त दूरे बोक असी। मेहणु आज अपनी जुओई बि परेम करण बिसरीं लगो असे। अउं इ सोब अब सिंहड़ी ना सकती। अउं बि इस मतोक केआं घेण लग गो असी।” त इ बोल कइ, टेकी मोमबती बि हुश गई।



से होता हुशोरी थी कि यक मठडू गभुरु तेस भखरी अन्तर आऊ। मोमबती हुशो हेर कइ से डर गऊ। तसे टिरी बइ एंखू नसण लगे त से रोलते रोलते बोलुण लगु, “ओ, तुस मोमबती जाओ किस नेई? तुसी त अखिरी तकर जाउंण एन्तु! तुस असी इ बचबचा छइ दी कइ घेई ना सकती?” तिखेई चोंथू मोमबती बोलु, “टयारे गभुरआ, डर नऊ! अउं आशा भो। जपल तकर अउं जाओ असी, अस होरी मोमबती फि जाई सकते।” ई शुण कई से गभुरु खुश भोई गऊ, त तेन गभुरु आशाई तागत जुओई शान्ति, विश्वास त परेम फि दुबारी जाई छड़े। एसे मतलब इ असा, कि जपल सोब किछ बुरु भुन्तु केईयेल, चोहरो कना अन्हारुई अन्हारु केईयेल, अपु से बि पराए लगण लगियेल, त तोउं बि उम्मीद छइ ना देण, आशा छइ ना देण। किस कि आशा या उम्मीद अन्तर अति शक्ति असी कि ए हर यक गडो चीज दुबारी वापस दिआई सकती। अपु आशाई मोमबती जाई रखे, हॉ अगर आशाई मोमबती जाओरी रेहियेल त तुस होर केसे बि मोमबती जाई सकते।

## कंटी के बुच फियूड


कंटी के बुच फियूड फूलते काए।  
छलारी के बुच किशती घेन्ते काई।  
अन्हारु टिगइयार अन्तर काउ।

कंटी के बुच फियूड फूलते काए।  
अपु हक जे मनख घेड़ी घेड़ी मेडींते  
काए।

असी केही अबल मेहणू बुरी संगत कते  
काए।

बढे त गरीब ईया बोज  
जोई कुआ बेउठी मेडींते  
काए।

बणते बणते कम केही  
बार असी बिगइते  
काए।



कंटी के बुच फियूड फूलते काए।  
असी केही लिंगी अपु मथलब जे लेहूए  
रिश्ते बि बगइते काए।

अपु चन भरण जे होरी लुटींते काए।  
टेई घेण बट चोर केही लिंगी मरते दम  
तकर मडते काए।

अपणेरी देशेरी मेहणू केही लिंगी धर्मे  
नाउ बढ मेडींते काए।

कंटी के बुच फियूड फूलते काए।  
भारत देश भो हें।

असी भुमण अन्तर असा ए टियारा।  
जेखेई-2 बी इस बट आंच आई,  
तेखेई-2 शुर वीर मातृभूमि बढ अमर  
भूते काए।

कंटी के बुच फियूड फूलते काए।  
विनोद कुमार

## तुबारि मासिक पत्रिका

◆अस इ उम्मिद करूं लगे असे कि एण बाड़े रोज अन्तर सुआ मेहणु इस कम अन्तर साथोट देन्ते।

◆इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगी घाटि अन्तर पढ़ूं जे त भाषाई सुहलियत करण जे इ पत्रिका शुरु किओ असी।

◆तुबारि एक अवाणिज्यिक पत्रिका भो।

◆तुबारि पत्रिका कोई मेहणु, जनजाति, त संस्कृति गलती कढेण जे नेई छपाण लगे। अगर कोई ई सोचता बि त अस जिम्मेबार नेई।

◆छपाणे पेहले सोभ आर्टिकल दुई टाई पांगेई मेहणु हरालो असे। इ त खुली बोक असी कि पेहिल बार पांगवाड़ि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल्स ना मिले, या घाटि मेहणु के साथोट ना मिले त तुबारि पत्रिका कदी बि बंद भुईं सकती।

◆कोई चीज छपां असी या नेई छपां जे तुबारि संपादकीय टीम पुरा अधिकार असा।

◆अस किलाड़ केन्द्रीय पुस्तकालय, त बजार हरिराम लाले दुकान अन्तर तुबारि झॉप बॉक्स पुठ बि अपु सझाव ओर अर्टिकल्स रखूं जे सुविधा किओ असी।

◆अस सोबी पांगी मेहणु जे हात जोड़ कइ अनुरोध कते कि, तुस बि कोई अछा अर्टिकल, पुराणि या नोई कथा, कहावत, कविता, त नोई घीत (पागवाड़ी अन्तर) लिख कइ छपां जे हेंघे दिए।

तुबारि संपादकीय टीम

☎ 9418429574

☎ 9418329200

☎ 9418411199

☎ 9418904168

☎ 9459828290



तुस अपु गेभुरु जेमली के बारे असी जे बोल सकते जेस कि अस तुबारि मेहने पत्रकेई बढ छापी सेकुं।



लविश कुमार, कुआ-वनोद कुमार, ग्रां-सेरी भटवास 7 अक्तुबरे एक साले पुरीता।

तेस पुरी तुबारि टिमे कनरा लख लख बधे।

दिल कियां नुसो असी दुआ हें

जिंदगी कियां मेओ लोती तुसी खुशी

गम ना दे भगवान तुंधे कपाले बी

मोजीकिने एक खुशी कम कई छण में।

इस महेन हें पुरे पांगेई अब सुआ जेई के जेटु त छेकी त वियहा भुंते तन्ही सोभी जोड़ी हें पुरी तुबारि टिमे कनरा लाख- लाख बधे त तुं जोड़ी सल. ामत रेहो लोती। हें एशुशी कइ।